

प्रादेशिक समाचार
आकाशवाणी जयपुर-अजमेर

दिनांक 06.10.2023

समय: 18.50 बजे

000

- प्रदेश मांय तीन और जिला बणाया जावेला- मुख्यमंत्री सुजानगढ, मालपुरा अर कुचामन सिटी ने जिला बणावण रो ऐलाण कीनो।
- निर्वाचन आयोग पांच राज्यां मांय आवता विधानसभा चुनाव ठीक तरीका ऊं करावण सारू पर्यवेक्षकां सागे मीटिंग कीनी।
- भारतीय रिजर्व बैंक नीतिगत ब्याज दरां मांय कोई बदलाव नी कीनो।
- भारत चीन मांय चाल रह्या एशियाई खेलां री पुरुष हॉकी होड़ मांय सोना रो तमगो जीत्यो-रिकॉर्ड 95 तमगा जीत र भारत चौथी ठोड माथे।

000

प्रदेश मांय तीन और जिला बणाया जावेला। मुख्यमंत्री अशोक गहलोत आज जयपुर मांय राख्यी ज्या एक कार्यक्रम मांय सुजानगढ, मालपुरा अर कुचामन सिटी ने जिला बणावण रो ऐलाण कीनो। ई पाछे राज्य मांय जिला री तादाद 53 व्हे जावेला। कार्यक्रम पाछे खबरनवीसा सागे बातचीत करता थकां गहलोत कह्यो के छोटे जिला अर ब्लॉक व्हेवण रे कारण लोगां ने वां रा काम सारू ज्यादा दूर नी जावणो पडेला अर वां री परेशानी कम व्हेला। वे कह्यो के राज्य ने मॉडल राज्य बणावण री पहल रा तैत ऐ नुवा जिला बणाया जा रह्या है।

000

निर्वाचन आयोग पांच राज्यां मांय विधानसभा चुनाव ठीक तरीका ऊं करावण सारू रणनीति तय करण बाबत आज नई दिल्ली मांय चुनाव पर्यवेक्षकां सागे मीटिंग कीनी। मुख्य निर्वाचन आयुक्त राजीव कुमार, चुनाव आयुक्त अनूप चन्द्रं पांडे अर अरुण गोयल सामान्य, पुलिस अर व्यय पर्यवेक्षकां सागे चर्चा कीनी। ध्यानजोग है के आवता कुछ बगत मांय राजस्थान, मध्यप्रदेश, छत्तीसगढ, तेलंगाना अर मिजोरम मांय विधानसभा चुनाव व्हेवणा है।

000

प्रदेश मांय निपख अर शांति सागे चुनाव करावण सारू न्यारी-न्यारी एजेंसियां कार्यवाही सरू कर दीनी है। राज्य मांय एक महीना मांय न्यारी-न्यारी एजेसियां मोटी तादाद मांय सामग्री अर नकदी जब्त कीनी है। राज्य रा मुख्य निर्वाचन अधिकारी प्रवीण गुप्ता बतायो के लारला एक महीना मांय 64 करोड़ रुपया ऊं बत्ता मोल री नशीली चीजां जब्त करी ज्यी है। हाल ताई 9 करोड़ 72 लाख रुपया री नकदी अर करीब 15 करोड़ रुपया री दारू जब्त करी जा चुकी है।

000

जल शक्ति मंत्री गजेंद्र सिंह शेखावत कह्यो है के मुख्यमंत्री अशोक गहलोत कानी ऊं काल जारी करी ज्यो विजन-2030 डॉक्यूमेंट राज्य सरकार री नाकामयाबी ऊं ध्यान हटावण री कोशिश है। वे आज जयपुर मांय भारतीय जनता पार्टी रा प्रदेश मुख्यालय मांय खबरनवीसां सागे बातचीत कर रह्या हा। शेखावत कह्यो के श्री गहलोत ने तीन दफा मुख्यमंत्री बणबा रो मौको मिल्यो पण तीजा कार्यकाल रा आखिरी दौर मांय वां ने विजन 2030 डॉक्यूमेंट री याद आयी। वे कह्यो के राज्य सरकार हर मोर्चा माथे नाकामयाब रही है, ज्यी कारण जनता रो ध्यान भटकावण सारू सरकार आ कोशिश कीनी है। शेखावत कह्यो के मुख्यमंत्री गहलोत केई हलकां मांय प्रदेश ने देश रो अब्बल राज्य व्हेवण रो दावो करे है, ई सारू भांत-भांत रा झूठा आंकड़ा पेश करी ज्या। वे कह्यो के हकीकत मांय राजस्थान देश रा 10 अगाड़ी राज्यां मांय ई शामिल नी है।

000

उपराष्ट्रपति जगदीप धनखड़ आज सीकर जिला रा लक्ष्मणगढ मांय मोदी विज्ञान अर प्रौद्योगिकी विश्वविद्यालय री छात्रावां ने सम्बोधित कीना। वे सांगलिया रा श्री तेजाजी मिन्दर मन्दिर मांय ई दर्शन कीना। उपराष्ट्रपति रो काल श्रीगंगानगर, हनुमानगढ अर जोधपुर रा दौरा रो कार्यक्रम है। वे सूरतगढ मांय सेंट्रल स्टेट फार्म अर जोधपुर मांय केन्द्रीय शुष्क क्षेत्र अनुसंधान केन्द्र-काजरी रो

दौरो करेला। उपराष्ट्रपति हनुमानगढ मांय गोगामेडी मिन्रदर अर कुंभारा धूणी, भोपालगढ मांय दर्शन अर पूजा—अर्चना ई करेला।

000

भारतीय रिजर्व बैंक री मौद्रिक नीति समिति द्विमासिक समीक्षा मांय खास ब्याज दरां मांय कोई बदलाव नी कीनो है। आज मुम्बई मांय व्ही समिति री मीटिंग पाछे आर.बी.आई. रा गवर्नर शक्तिकांत दास आ जाणकारी दीनी। वे कह्यो के मौद्रिक नीति समिति एक राय ऊं रेपो रेट मांय कोई बदलाव नी करण रो फ़ैसलो कीनो। रिजर्व बैंक री ओर ऊं जारी बयान रे मुजब व्यापक आर्थिक अर वित्तीय घटनाक्रमां रा विगतवार मूल्यांकन पाछे समिति लगातार चौथी दफ़ा ब्याज री रेट मांय कोई बदलाव नी करण रो फ़ैसलो कीनो। ध्यानजोग है के स्थायी जमा सुविधा दर— एसडीएफ सवा छः फीसदी अर सीमांत स्थायी सुविधा दर—एमएसएफ अर बैंक रेट पौने सात फीसदी री रेट माथे ई बणी रेहवेला। बयान रे मुजब टमाटर अर दूजी तरकारियां रा मोल मांय बधोतरी रे कारण जुलाई मांय महंगाई मांय बधोतरी व्ही। अगस्त महीना मांय इण मांय थोड़ो सुधार निजर आयो। सितंबर महीना मांय कीमतां मांय कमी रे कारण महंगाई मांय थोड़ी कमी आयी। खाण—पीण री चीजां अर ईंधन रे अलावा मुख्य मुद्रास्फीति मांय गिरावट रो रुख है। बयान रे मुजब साल 2023—24 सारु वास्तविक सकल घरेलू उत्पाद मांय बधोतरी री रेट साढे छः फीसदी रेहवण रो अनुमान है। दूजी तिमाही मांय इण रे साढे छः, तीजी तिमाही मांय 6 फीसदी अर आखिरी तिमाही मांय 5 दशमलव 7 फीसदी रेहवण रो अंदाजो है। साल 2024—25 री पहली तिमाही सारु सकल घरेलू उत्पाद मांय वास्तविक वृद्धि दर 6 दशमलव 6 फीसदी रेहवण रो अंदाजो है।

000

देश मांय दो हजार रुप्या रा करीब साढे तीन फीसदी यानि 12 हजार करोड़ रुप्या रा नोट हाल ई बाजार मांय है। भारतीय रिजर्व बैंक रा गवर्नर शक्तिकांत दास आज मुंबई मांय खबरनवीसां ने आ जाणकारी दीनी। वे बतायो के दो—दो हजार रुप्या रा कोई 3 लाख 43 हजार करोड़ रुप्या मोल रा नोट पाछा आ गया है। दो हजार रुप्या रा नोट ई साल 19 मई ने बाजार ऊं पाछा लेवण रो फ़ैसलो करी ज्यो हो। दो हजार रुप्या रो नोट वैध मुद्रा व्हेवण रे बावजूद, बैंक आं ने बदली करण या वां ने खाता मांय जमा करावण री आखिरी तारीख काल 7 अक्टूबर पाछे जमा नी करेला।

000

जी—20 देशां रा संसद अध्यक्षां रो नौ वों सम्मेलन ई महीना री 13 अर 14 तारीख ने नई दिल्ली मांय व्हेला। सम्मेलन री थीम है — एक पृथ्वी, एक परिवार, एक भविष्य के लिए संसद। लोकसभा अध्यक्ष ओम बिरला आज नई दिल्ली मांय खबरनवीसां सागे बातचीत करता थकां आ जाणकारी दीनी। वे बतायो के ई सम्मेलन मांय स्वास्थ्य, भणार्ई—लिखाई, खेती—बाड़ी अर ऊर्जा ऊं जुड़्या मुद्दां सागे आब—ओ—हवा मांय बदलाव रा बारा मांय गहराई ऊं विचार कर्यो जावेला।

000

राज्य सरकार किसानां रा भला सारु 'राजस्थान राज्य कृषक ऋण राहत योजना आयोग' बणायो है। सरकार रिटायर्ड जज प्रकाशचंद गुप्ता ने आयोग रा अध्यक्ष बणायो है। वां सागे ई रिटायर्ड आईएएस अहलकार पी.के. गोयल, महाराणा प्रताप कृषि विश्वविद्यालय रा पैली वाळा कुलपति एस.एन. राठौड़, हरिकुमार गोदारा अर सुनील गहलोत ने आयोग रा सदस्य बणायी ज्यो है। ओ आयोग बैंकां अर किसानां बीचे कर्ज ऊं जुड़्या झगडा समझाइश अर बातचीत रे मार्फत निपटावण अर खेतीबाड़ी सारु कर्ज देवण ऊं जुड़्या सुझाव देवण रा काम करेला।

000

चीन मांय चाल रह्या एशियाई खेलां री पुरुष हॉकी होड़ मांय भारत सोना रो तमगो जीत लीनो है। फाइनल मांय भारत जापान ने 5—1 ऊं शिकस्त दीनी। ई सागे ई भारत ओलम्पिक खेलां री पुरुष हॉकी होड़ मांय सिरकत करण री काबिलियत हासिल कर लीनी। पुरुषां री ब्रिज होड़ मांय भारत चांदी रो तमगो जीत्यो। भारत ने तीरंदाजी री महिला रिकर्व होड़ मांय कांसा रो अर पुरुषां री होड़ मांय चांदी रो तमगो मिल्यो। सेपकटकरॉ होड़ मांय भारत री महिला टीम कांसा रो तमगो जीत्यो। महिला कुश्ती रा 62 किलोग्राम फ्री स्टाइल वर्ग मांय भारत री सोनम अर 76 किलो फ्री स्टाइल वर्ग मांय किरण बिश्नोई कांसा रा तमगा जीत्या। पुरुषां री कुश्ती री 57 किलोग्राम फ्री

स्टाइल होड़ मांय अमन कांसा रो तमगो जीत्यो। बैडमिंटन रा सिंगल्स मुकाबला मांय एच.एस. प्रणय कांसा रो तमगो जीत्यो।

ई सागे ई भारत हाल ताई 95 तमगा हासिल कर लीना है, जो कीर्तिमान है। भारत हाल ताई सोना रा 22, चांदी रा 34 अर कांसा रा 39 तमगा जीत र चौथी ठोड माथे बण्योडो है।

000

विश्वकप क्रिकेट होड़ रा तैत आज हैदराबाद मांय पाकिस्तान अर नीदरलैण्ड बीचे मुकाबलो व्हे रह्यो है। नीदरलैण्ड टॉस जीत र पाकिस्तान ने पैली बल्लेबाजी करण सारू बुलायो। पाकिस्तान री पूरी टीम 49 ऑवर खेल र 286 रन बणा र आउट व्हे ग्यी। जवाब मांय नीदरलैण्ड री टीम आखिरी समाचार मिलण ताई 11 ऑवर 1 गेंद रा खेल मांय 51 रन बणा लीना हा अर वां रा 2 खिलाडी आउट व्हा हा।

000